



KEMENTERIAN PENDIDIKAN TINGGI
JABATAN PENDIDIKAN POLITEKNIK DAN KOLEJ KOMUNITI

SIARAN MEDIA

ASEAN DAN KESATUAN EROPAH (EU) PERKUKUH KERJASAMA KE ARAH PEMBANGUNAN TENAGA KERJA MASA HADAPAN

PULAU PINANG - ASEAN dan Kesatuan Eropah (EU) terus memperkukuh kerjasama strategik dalam memperkasa kesiapsiagaan tenaga kerja dan pembangunan kemahiran serantau menerusi penganjuran 'Closing the Gap Workshop 2026' yang berlangsung dari 12 hingga 14 Mei 2026 di Pulau Pinang.

Program anjuran Kementerian Pendidikan Tinggi (KPT) melalui Jabatan Pendidikan Politeknik dan Kolej Komuniti (JPPKK) dan program EU-ASEAN Sustainable Connectivity Package – Higher Education (SCOPE-HE) menghimpunkan wakil dari pihak kerajaan, institusi Pendidikan dan Latihan Teknikal dan Vokasional (TVET), pihak industri serta organisasi serantau di seluruh ASEAN bagi berkongsi pengalaman dan meneroka model kerjasama berkesan antara institusi pendidikan dan industri.

Dalam ucapan pembukaan, Duta Kesatuan Eropah ke ASEAN, Sujiro Seam menekankan kepentingan memperkukuh hubungan pendidikan dan industri bagi memenuhi keperluan kemahiran masa depan ASEAN.

Katanya, bengkel ini merupakan langkah penting dalam pelaksanaan Pelan Tindakan ASEAN–EU 2023–2027 yang memberi penekanan kepada pembangunan TVET melalui perkongsian amalan terbaik dan pengukuhan kerjasama serantau.

Sementara itu, Dr. Zamzam Mohd Walid, Pengarah Bahagian Koordinasi TVET JPPKK yang mewakili Ketua Pengarah Pendidikan Politeknik dan Kolej Komuniti ketika dalam ucapan pembukaannya, berkata Malaysia sedang memperkukuh ekosistem TVET negara dengan mengintegrasikan kompetensi teknikal bersama elemen pemikiran kritikal, kebolehsuaian dan pembelajaran sepanjang hayat selaras dengan Pelan Rancangan Pendidikan Tinggi Malaysia 2026–2035.

“Pendidikan masa depan perlu melangkaui bilik darjah dan dilaksanakan melalui kolaborasi erat antara institusi pendidikan serta industri,” katanya.

Program seumpama ini dilihat penting dalam memastikan keselarasan antara pendidikan dan industri agar pelajar dilengkapi dengan kemahiran yang relevan untuk masa hadapan dunia pekerjaan.

Siri ‘Closing the Gap Workshop’ diperkenalkan bagi menangani cabaran kebolehpasaran graduan dan memperkukuh kesepadanan antara sistem TVET dengan keperluan pasaran kerja di ASEAN. Sepanjang bengkel berlangsung, peserta akan terlibat dalam sesi panel, perbincangan kumpulan dan latihan interaktif bagi mengenal pasti mekanisme kerjasama yang berkesan dalam meningkatkan kerelevanan TVET, kebolehpasaran graduan dan kesiapsiagaan tenaga kerja.

-TAMAT-

**JABATAN PENDIDIKAN POLITEKNIK DAN KOLEJ KOMUNITI
KEMENTERIAN PENDIDIKAN TINGGI
13 Mei 2026**